

大正藏第 08 册 No. 0255

般若波罗蜜多心经 1 卷

No. 255 [Nos. 250-254, 257]

般若波罗蜜多心经(焘煌石室本)

国大德三藏法师沙门法成译

如是我闻：

一时薄伽梵住王舍城鹫峯山中，与大苾芻众及诸菩萨摩訶萨俱。尔时，世尊等入甚深明了三摩地法之异门。复于尔时，观自在菩萨摩訶萨行深般若波罗蜜多时，观察照见五蕴体性悉皆是空。

时，具寿舍利子，承佛威力，白圣者观自在菩萨摩訶萨曰：「若善男子欲修行甚深般若波罗蜜多者，复当云何修学？」作是语已。

观自在菩萨摩訶萨答具寿舍利子言：「若善男子及善女人，欲修行甚深般若波罗蜜多者，彼应如是观察，五蕴体性皆空。色即是空，空即是色。色不异空，空不异色。如是受、想、行、识亦复皆空。是故舍利子！一切法空性无相，无生无灭，无垢离垢，无减无增。舍利子！是故尔时空性之中，无色、无受、无想、无行亦无有识。无眼、无耳、无鼻、无舌、无身、无意。无色、无声、无香、无味、无触、无法。无眼界乃至无意识界。无无明亦无无明尽，乃至无老死亦无老死尽。无苦、集、灭、道，无智无得亦无不得。是故舍利子！以无所得故，诸菩萨众依止般若波罗蜜多，心无障碍，无有恐怖，超过颠倒，究竟涅槃。三世一切诸佛亦皆依般若波罗蜜多故，证得无上正等菩提。舍利子！是故当知般若波罗蜜多大密咒者，是大明咒，是无上咒，是无等等咒。能除一切诸苦之咒，真实无倒。故知般若波罗蜜多是秘密咒。」

即说般若波罗蜜多咒曰：

「𦉑帝 𦉑帝 波啰𦉑帝 波啰僧𦉑帝 菩提 莎诃

「舍利子！菩萨摩訶萨应如是修学甚深般若波罗蜜多。」

尔时，世尊从彼定起，告圣者观自在菩萨摩訶萨曰：「善哉，善哉！善男子！如是，如是！如汝所说。彼当如是修学般若波罗蜜多。一切如来亦当随喜。」

时薄伽梵说是语已。具寿舍利子，圣者观自在菩萨摩訶萨，一切世间天、人、阿苏罗、干闥婆等，闻佛所说，皆大欢喜，信受奉行。

般若波罗蜜多心经

【经文信息】大正藏第 08 册 No. 0255 般若波罗蜜多心经

【版本记录】CBETA 电子佛典 Rev. 1.15 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】庄德明大德提供，CBETA 自行扫描辨识，CBETA 提供新式标点，其他

【其他事项】本数据库可自由免费流通，详细内容请参阅【中华电子佛典协会数据库版权宣告】
